

შპს „კავკასუს ონლაინის“ მიერ ინტერნეტის გლობალურ რესურსთან დაშვების შეთავაზების წინადადება („მოწვევის ოფერტა“)

წინამდებარე მოწვევის ოფერტით განსაზღვრულია შპს „კავკასუს ონლაინის“ (რეგისტრირებული მისამართი: თბილისი, ვაჟა-ფშაველას 71, საიდენტიფიკაციო კოდი: 211380833) (შემდგომში „ოფერენტი“ ან „ონლაინი“) მიერ ინტერნეტის გლობალურ რესურსთან დაშვების შეთავაზების პირობები, რომელიც განსაზღვრულია და ვრცელდება ინტერნეტის გლობალურ რესურსთან დაშვების მსურველი ყველა ავტორიზებული პირის მიმართ (შემდგომში „აქცეპტანტი“ ან „მეორე მხარე“)

“ონლაინი” უზრუნველყოფს აქცეპტანტის დაშვებას ინტერნეტის გლობალურ რესურსთან შემდეგი პირობებით:

მუხლი 1. ტერმინთა განმარტება

1.1. წინამდებარე ხელშეკრულებაში გამოყენებულ ტერმინებს აქვთ შემდეგი მნიშვნელობა:

- 1.1.1. ავარია - მხარის ტექნიკური საშუალებ(ებ)ისა და/ან მოწყობილობ(ებ)ის მწყობრიდან გამოსვლა, მხარის ბრალეული (განზრახვა, გაუფრთხილებლობა) ქმედების გარეშე და ფორს-მაჟორული გარემოების არარსებობისას;
- 1.1.2. აქცეპტის დოკუმენტაცია - 2.3 მუხლში მითითებული დოკუმენტები, რომლებიც “აქცეპტანტმა” უნდა წარუდგინოს “ონლაინს” დაშვების პროცედურის ინიცირების მიზნით;
- 1.1.3. აქცეპტის ფორმა - “აქცეპტანტის” მიერ “მოწვევის ოფერტის” შესაბამისად შევსებული დანართი #2, რომელიც ეგზავნება “ოფერენტს” დასადასტურებლად “მოწვევის ოფერტაში” მითითებული პირობების შესაბამისად;
- 1.1.4. ინტერნეტ მომსახურების ხელშეკრულება - “ოფერენტს” (ანუ “ონლაინს”) და “აქცეპტანტს” (ანუ “მეორე მხარეს”) შორის “მოწვევის ოფერტაზე” აქცეპტის გაკეთების შედეგად გაფორმებული ხელშეკრულება ინტერნეტის გლობალურ რესურსთან “ონლაინის” მიერ “აქცეპტანტის” დაშვების მომსახურების შესახებ;
- 1.1.5. საპატიო მოცდენა - გეგმიური სარემონტო და გეგმიური სხვაგვარი სამუშაოს ხანგრძლივობა, აგრეთვე, ფორსმაჟორული შემთხვევის მთლიანი ხანგრძლივობა;
- 1.1.6. ურთიერთჩართვის წერტილი - თბილისში, ვაჟა-ფშაველას 71-ში მდებარე “ონლაინის” თანალოკაციის ფართში არსებული ურთიერთჩართვის წერტილი, სადაც ხორციელდება ინტერნეტის გლობალურ რესურსთან დაშვების მიწოდება;

1.2. წინამდებარე ხელშეკრულებაში გამოყენებული სხვა ტერმინების მნიშვნელობა განისაზღვრება საქართველოს სამოქალაქო კოდექსისა და “ელექტრონული კომუნიკაციების შესახებ” საქართველოს კანონის შესაბამისად.

მუხლი 2. დაშვებასთან დაკავშირებული დათქმები, დაშვების წინაპირობები და პროცედურები

2.1. ორაზროვნებისა და გაუგებრობის თავიდან აცილების მიზნით მხარეები ადასტურებენ, რომ “ონლაინის” მიერ ინტერნეტის გლობალურ რესურსთან “აქცეპტანტის” დაშვების მიზნით და საკუთრივ დაშვებით არ ხორციელდება “ონლაინის” ან/და სხვა მესამე პირის კუთვნილ თუ მართლზომიერ სარგებლობაში არსებულ ქსელსა თუ კაბელში რაიმე სახითა თუ ფორმით ციფრული არხის გამოყოფა და, შესაბამისად, წინამდებარე “მოწვევის ოფერტა” და “ინტერნეტ მომსახურების

ხელშეკრულება” არ შეიძლება განიმარტოს ისე, რომ “აქცეპტანტს” წარმოეშვას რაიმე უფლება “ონლაინის” ან/და სხვა მესამე პირის კუთვნილ თუ მართლზომიერ სარგებლობაში არსებულ ქსელსა თუ კაბელში რომელიმე და ნებისმიერი ციფრული არხის, მთლიანად თუ ნაწილობრივ, რაიმე ფორმით გამოყენებისა და სარგებლობის თაობაზე;

2.2. “ონლაინი” უზრუნველყოფს “მეორე მხარისათვის” ინტერნეტის გლობალურ ქსელთან დაშვების მიწოდებას იმგვარი არადისკრიმინაციული და ერთგვაროვანი პირობებით (მათ შორის ტარიფებით, ხარისხით, მიწოდების ვადებით), რომლებიც არანაკლებ ხელსაყრელია, ვიდრე საკუთარი სტრუქტურული ქვედანაყოფისათვის, აფილირებული ან/და სხვა ავტორიზებული პირებისათვის;

2.3. დაშვების პროცედურის ინიცირებისათვის აუცილებელი წინაპირობაა, რომ “აქცეპტანტს” არ ჰქონდეს “ონლაინის” მიმართ შეუსრულებელი რაიმე სახის ფულადი ვალდებულება და, რომ “აქცეპტანტმა” “ონლაინს” წარუდგინოს შემდეგი დოკუმენტები (“აქცეპტის დოკუმენტაცია”):

2.3.1. ელექტრონული კომუნიკაციების შესახებ საქართველოს კანონის შესაბამისად “აქცეპტანტის” მიერ მოპოვებული ავტორიზაციის დამადასტურებელი დოკუმენტის ორიგინალი;

2.3.2. ამონაწერი მეწარმეთა და არასამეწარმეო (არაკომერციული) იურიდიული პირების რეესტრიდან “აქცეპტანტის” შესახებ;

2.3.3. “აქცეპტანტის” უფლებამოსილი წარმომადგენლის პირადობის დამადასტურებელი დოკუმენტის ასლი;

2.3.4. აქცეპტანტის უფლებამოსილი წარმომადგენლის უფლებამოსილების დამადასტურებელი დოკუმენტის ორიგინალი ან დამოწმებული ასლი, იმ შემთხვევაში თუ “აქცეპტანტს” წარმოადგენს პირი, რომელიც არ არის მითითებული 2.3.2 პუნქტში მითითებულ ამონაწერში;

2.3.5. “აქცეპტანტის” უფლებამოსილი წარმომადგენლის მიერ ხელმოწერილი და შევსებული “აქცეპტის ფორმა”.

“აქცეპტის დოკუმენტაცია” “აქცეპტანტმა” უნდა გააგზავნოს წერილობითი ფორმით, ფოსტით “ონლაინის” რეგისტრირებულ მისამართზე, აგრეთვე, ელექტრონული ფოსტით შემდეგ მისამართზე: info@co.ge სათაურით (ელ. ფოსტის subject line-ში ჩასაწერი ტექსტი) “[ავტორიზებული პირის დასახელება]-ის აქცეპტის დოკუმენტაცია ინტერნეტის გლობალურ რესურსთან დაშვების თაობაზე”.

2.4. “აქცეპტის დოკუმენტაციის” წერილობით და ელექტრონული ფოსტით მიღებიდან 8 (რვა) სამუშაო დღეში “ონლაინი” შეისწავლის მათ შესაბამისობას ზემოთ მითითებულ მოთხოვნებთან.

2.5. იმ შემთხვევაში, თუ “აქცეპტის დოკუმენტაცია” არ აკმაყოფილებს 2.3 მუხლის მოთხოვნებს ან “აქცეპტანტს” გააჩნია შეუსრულებელი ფულადი ვალდებულებები “ონლაინის” მიმართ, მაშინ “ონლაინი” დაუბრუნებს “აქცეპტანტს” “აქცეპტის დოკუმენტაციას” და ჩაითვლება, რომ აქცეპტი არ გაკეთებულა და, შესაბამისად, “ოფერენტს” არ აქვს ვალდებულება უზრუნველყოს “აქცეპტანტის” დაშვება ინტერნეტის გლობალურ რესურსთან.

2.6. იმ შემთხვევაში, თუ “აქცეპტის დოკუმენტაცია” აკმაყოფილებს 2.3 მუხლის მოთხოვნებს და “აქცეპტანტს” არ გააჩნია შეუსრულებელი ფულადი ვალდებულებები “ონლაინის” მიმართ, მაშინ “ონლაინი” უგზავნის “მეორე მხარეს” ინტერნეტის გლობალურ რესურსთან დაშვების მომსახურების ხელშეკრულების (“ინტერნეტ მომსახურების ხელშეკრულება”) სამ ეგზემპლარს, რომელთაგან თითოეული მოიცავს “ონლაინის” უფლებამოსილი წარმომადგენლის ხელმოწერას. ასეთ შემთხვევაში “აქცეპტანტი” ვალდებულია 4 (ოთხი) სამუშაო დღის ვადაში დაუბრუნოს “ონლაინს” “აქცეპტანტის” უფლებამოსილი წარმომადგენლის მიერ ხელმოწერილი “ინტერნეტ მომსახურების ხელშეკრულების” ორი ეგზემპლარი. დათქმულ ვადაში “აქცეპტანტის” მიერ “ინტერნეტ

მომსახურების ხელშეკრულების” სათანადო ფორმით “ონლაინისათვის” წარუდგენლობის შემთხვევაში ჩაითვლება, რომ “აქცეპტანტი” უარს ამბობს ინტერნეტის გლობალურ რესურსთან დაშვების “ონლაინის” მიერ შეთავაზებულ მომსახურებაზე და, რომ “აქცეპტანტსა” და “ონლაინს” შორის არ წარმოიშობა შესაბამისი სამართლებრივი ურთიერთობა.

2.7. “ინტერნეტ მომსახურების ხელშეკრულება” ძალაში შედის მხარეთა მიერ მისი ხელმოწერისთანავე და მოქმედებს 6 თვის ვადით.

2.8. “ინტერნეტ მომსახურების ხელშეკრულების” საფუძველზე “ონლაინის” მიერ “აქცეპტანტისათვის” ინტერნეტის გლობალურ რესურსთან დაშვების მომსახურება დაიწყება აღნიშნული ხელშეკრულების ძალაში შესვლიდან 5 (ხუთი) სამუშაო დღის ვადაში, იმ პირობით, რომ მოცემულ ვადაში “აქცეპტანტი” დააკმაყოფილებს “მოწვევის ოფერტით” განსაზღვრულ ურთიერთჩართვის ტექნიკურ მოთხოვნებს.

2.9. “ინტერნეტ მომსახურების ხელშეკრულების” მოქმედების განმავლობაში ნებისმიერ დროს, იმ პირობით, რომ მოცემული მომენტისათვის “აქცეპტანტს” შესრულებული აქვს “ონლაინის” მიმართ ყველა ფულადი ვალდებულება, “აქცეპტანტი” უფლებამოსილია მოითხოვოს ინტერნეტის გლობალურ რესურსთან დაშვებისათვის დამატებითი გამტარუნარიანობის სიმძლავრის გამოყოფა. ასეთი წერილობითი მოთხოვნის წარდგენის შემდეგ, იმ შემთხვევაში თუ “ონლაინს” აქვს შესაბამისი რესურსი, “ონლაინი” და “აქცეპტანტი” აფორმებენ შესაბამის ცვლილებას “ინტერნეტ მომსახურების ხელშეკრულებაში”. “აქცეპტანტის” მოთხოვნის გაგზავნა, განხილვა და დადასტურება, ხოლო შემდგომ “ონლაინის” მიერ “აქცეპტანტისათვის” ცვლილებების პროექტის გაგზავნა და გაფორმება ხდება 2.3-2.6 და 2.8 მუხლებით განსაზღვრული პირობებისა და ვადების ანალოგიურად.

2.10. “ინტერნეტ მომსახურების ხელშეკრულების” მოქმედება შეიძლება შეწყდეს შემდეგი საფუძველებით:

2.10.1. მხარეთა შეთანხმება;

2.10.2. მოქმედების ვადის გასვლა;

2.10.3. ერთ-ერთი მხარის მიერ „მოწვევის ოფერტის“ ან „ინტერნეტ მომსახურების ხელშეკრულების“ პირობების სისტემატური დარღვევა ან არაჯეროვანი შესრულება, თუ ამგვარი დარღვევა არ აღმოიფხვრა დამრღვევი მხარის მიერ მეორე მხარისაგან წერილობითი შეტყობინებიდან 10 (ათი) სამუშაო დღის განმავლობაში;

2.10.4. ერთ-ერთი მხარის ლიკვიდაცია;

2.10.5. ერთ-ერთი მხარის მიმართ გადახდისუნარიანობის საქმის წარმოების დაწყება;

2.10.6. საქართველოს კანონმდებლობით დადგენილი სხვა საფუძველები.

მუხლი 3. დაშვების ტექნიკური საკითხები და ხარისხი

3.1. ინტერნეტის გლობალურ რესურსთან “აქცეპტანტის” დაშვების მიზნით მხარეებს შორის ურთიერთჩართვა ხორციელდება “ურთიერთჩართვის წერტილში” და პაკეტური კომუტაციის ქსელებით ინტერნეტ ტრაფიკის გადაცემა ხორციელდება TCP/IP პროტოკოლისა და BGP მარშრუტიზაციის პროტოკოლის შესაბამისად, ოპტიკური ან ეზერნეტ ინტერფეისის გამოყენებით.

- 3.2. “ონლაინის” მიერ ქსელის რეორგანიზაციის, მისი ადგილმდებარეობის, ან სხვა შემთხვევებში “ურთიერთჩართვის წერტილის” სხვა ადგილას გადატანის შესახებ “ონლაინი” “მეორე მხარეს” აცნობებს წერილობით “ურთიერთჩართვის წერტილის” შეცვლამდე ერთი თვით ადრე.
- 3.3. “ონლაინი” იღებს ვალდებულებას უზრუნველყოს “აქცეპტანტის” დაშვება ინტერნეტის გლობალურ რესურსთან “აქცეპტის ფორმაში” მითითებული გამტარუნარიანობის სიმძლავრით “მოწვევის ოფერტით” განსაზღვრული პირობების შესაბამისად;
- 3.4. ინტერნეტის გლობალურ რესურსთან “აქცეპტანტის” დაშვება ხორციელდება “ურთიერთჩართვის წერტილში” “ინტერნეტ მომსახურების ხელშეკრულების” საფუძველზე. მოცემული მომსახურების ეფექტურობის უზრუნველსაყოფად, “მეორე მხარე” ვალდებულია, “მოწვევის ოფერტის” პირობების შესაბამისად შევსებული “აქცეპტის ფორმის” “ონლაინისათვის” გაგზავნის მომენტში, საკუთარი ძალისხმევითა და სახსრებით უზრუნველყოს შესაბამისი ფიზიკური არხის მიყვანა “ურთიერთჩართვის წერტილში” და საკუთარი ტექნიკური საშუალებების (მათ შორის ფიზიკური არხის, პორტისა და პროგრამული უზრუნველყოფის) შესაბამისობაში მოყვანა “ონლაინის” მიერ “ურთიერთჩართვის წერტილში” განთავსებულ და ინტერნეტის გლობალურ რესურსთან დაშვებისათვის განკუთვნილ ხელსაწყოებსა და პროგრამულ უზრუნველყოფასთან.
- 3.5. ინტერნეტის გლობალურ რესურსთან “აქცეპტანტის” დაშვების მომსახურების ფარგლებში “ონლაინი” უზრუნველყოფს მომსახურების 99.5% ხელმისაწვდომობას (ანუ შეუფერხებლად მიწოდებას) ყოველი შესაბამისი კალენდარული თვის განმავლობაში “საკატიო მოცდენის” ხანგრძლივობის გათვალისწინების გარეშე, ანუ “ონლაინი” ვალდებულია გაუწიოს “მეორე მხარეს” ინტერნეტის გლობალურ რესურსთან დაშვების მომსახურება იმგვარად, რომ მომსახურების შეფერხება, “საკატიო მოცდენის” ხანგრძლივობის გარდა, არ უნდა აღემატებოდეს 3 (სამი) საათსა და 21 (ოცდაერთი) წუთს შესაბამისი კალენდარული თვის განმავლობაში.
- 3.6. მხარეები მიიღებენ ყველა შესაძლო გონივრულ ზომას, რათა უზრუნველყონ ურთიერთჩართვის საექსპლუატაციო უსაფრთხოება, როგორც ურთიერთჩართვის წერტილებში, ისე მხარეთა კუთვნილ მოწყობილობებზე.

მუხლი 4. ექსტრაორდინარულ, ფორსმაჟორულ, ავარიულ და სარემონტო სამუშაოების შემთხვევებთან დაკავშირებული პირობები და მხარეთა ურთიერთვალდებულებები

- 4.1. “ონლაინმა” გეგმიური სარემონტო ან გეგმიური სხვაგვარი სამუშაოების ჩატარების შესახებ უნდა შეატყობინოს “მეორე მხარეს” სულ მცირე 10 (ათი) კალენდარული დღით ადრე. გეგმიური სარემონტო თუ გეგმიური სხვაგვარი სამუშაოს ხანგრძლივობა არ უნდა აღემატებოდეს 4 (ოთხი) საათს, არ უნდა სრულდებოდეს თვეში ერთზე მეტჯერ და უნდა ჩატარდეს 01:00-06:00 საათების ინტერვალში, გარდა იმ შემთხვევისა თუ მხარეები სხვა რამეზე არ შეთანხმდებიან.
- 4.2. ავარიის შემთხვევაში, “მეორე მხარე” 4 (ოთხი) საათის განმავლობაში “ონლაინს” უგზავნის შეტყობინებას ელექტრონული ფოსტით, შემდეგ მისამართზე noc@co.ge (ასლის საქართველოს კომუნიკაციების ეროვნულ კომისიაში გადაგზავნით post@gncc.ge), ავარიის შესახებ და “ონლაინი” იღებს ყველა შესაძლებელ ზომას, რათა გონივრულ ვადაში, რაც არ უნდა აღემატებოდეს შეტყობინებიდან 24 საათს, აღმოფხვრას ავარიის მიზეზები და აღადგინოს მომსახურების შეუფერხებლად მიწოდება.
- 4.3. მხარეთა პასუხისმგებლობა არ დგება დაუძლეველი ძალის მოქმედების შემთხვევაში. მხარეები თავისუფლდებიან პასუხისმგებლობისაგან ვალდებულებების სრული და ნაწილობრივი შეუსრულებლობისათვის დაუძლეველი ძალის მოქმედების შემთხვევაში, რომლის დროსაც შეუძლებელია “მოწვევის ოფერტითა” და “ინტერნეტ მომსახურების ხელშეკრულებით” გათვალისწინებული ვალდებულებების შესრულება.

- 4.4. “დაუძლეველი ძალის” ქვეშ იგულისხმება გარემოებები, რომლებიც არ არსებობდნენ “ინტერნეტ მომსახურების ხელშეკრულების” გაფორმების დროს და რომელთა დადგომა და ზემოქმედება მხარეებს არ შეეძლოთ თავიდან აეცილებინათ და გადაელახათ. კერძოდ, წყალდიდობა, მიწისძვრა, აფეთქებები, ხანძარი, ავარია, ომი და საომარი მოქმედებები, ბლოკადა, გაფიცვები. კანონმდებლობის ცვლილებები, რომლებიც აუარესებენ წინამდებარე ხელშეკრულებას სუბიექტების სამართლებრივ სტატუსსა და რეჟიმს. თუ ნებისმიერმა ზემოთნახსენებმა გარემოებამ უშუალოდ იმოქმედა მხარეთა მიერ ნაკისრი ვალდებულებების შესრულების ვადებზე, მაშინ ეს ვადები ამ გარემოებების მოქმედების დროის თანაბარზომიერად გაიზრდება.
- 4.5. მხარე, რომლისთვისაც ფორს-მაჟორული გარემოებების დადგომის გამო შეუძლებელი შეიქმნა ვალდებულებების შესრულება, ვალდებულია დაუყოვნებლივ, მაგრამ ყველა შემთხვევაში არაუგვიანეს ხუთი დღისა ამ გარემოებების დადგომიდან და დასრულებიდან, აცნობოს მეორე მხარეს.
- 4.6. შეუტყობინებლობისა და დაგვიანებული შეტყობინების შემთხვევაში შესაბამისი მხარე კარგავს უფლებას დაეყრდნოს ფორს-მაჟორული გარემოებების არსებობას, როგორც პასუხისმგებლობისგან გათავისუფლების საფუძველს. შეტყობინებაში მითითებული ფაქტები შემდგომში უნდა დასტურდებოდეს.
- 4.7. თუ დაუძლეველი ძალის მოქმედება გრძელდება 15 დღეზე მეტხანს, მხარეებმა უნდა გადაწყვიტონ “ინტერნეტ მომსახურების ხელშეკრულების” მოქმედების შეწყვეტის საკითხი.

მუხლი 5. ანგარიშსწორების პირობები

- 5.1. “აქცეპტანტისათვის” “ონლაინის” მიერ გაწეული ინტერნეტის გლობალურ რესურსთან დაშვების მომსახურების საფასური (“დაშვების საფასური”) გამოიანგარიშება დანართში #1 მითითებული ტარიფების შესაბამისად, “აქცეპტანტის” სასარგებლოდ “ინტერნეტ მომსახურების ხელშეკრულების” საფუძველზე გამოყოფილი გამტარუნარიანობის სიმძლავრის მოცულობის გათვალისწინებით.
- 5.2. საქართველოს კანონმდებლობის შესაბამისად „ონლაინის“ მიერ მოწვევის ოფერტით განსაზღვრული პირობებისა და ტარიფების შეცვლის შემთხვევაში, „ონლაინი“ ვალდებულია 30 კალენდარული დღით ადრე აცნობოს „მეორე მხარეს“ ინტერნეტის გლობალურ რესურსთან დაშვების განხორციელების პირობებისა და ტარიფების ცვლილების შესახებ და შეცვალოს „ინტერნეტ მომსახურების ხელშეკრულებით“ გათვალისწინებული შესაბამისი პირობები და ტარიფები გამოქვეყნებული „მოწვევის ოფერტი“ შეთავაზებული პირობებისა და ტარიფების შესაბამისად.
- 5.3. მხარეებს შორის ანგარიშსწორება წარმოებს ყოველთვიურად, საბანკო გადარიცხვის პირობით. საქართველოს საგადასახადო კოდექსით დადგენილ ვადებში “ონლაინი” ვალდებულია “მეორე მხარეს” მიაწოდოს დამატებული ღირებულების გადასახადის საგადასახადო ანგარიშფაქტურა “დაშვების საფასურის” დარიცხვის შესახებ. ანგარიშსწორება მხარეთა შორის ხორციელდება დამატებული ღირებულების გადასახადის საგადასახადო ანგარიშფაქტურის საფუძველზე სრული მოცულობით, არაუგვიანეს საანგარიშსწორებო თვის მომდევნო თვის 14 რიცხვისა. გადახდის აღნიშნული ვადა პროპორციულად გადაიწევს ერთი მხარისათვის იმ ვადით, რა ვადითაც მეორე მხარე გადააცილებს წინამდებარე პუნქტში მითითებულ საანგარიშსწორებო დოკუმენტების წარდგენის ვადას.
- 5.4. ანგარიშსწორების ვადის დარღვევის შემთხვევაში “ონლაინი” უფლებამოსილია ვალდებულების დარღვევის დღიდან დაარიცხოს “აქცეპტანტს”, ხოლო “აქცეპტანტი” ვალდებულია გადაუხადოს “ონლაინს” პირგასამტეხლო გადასახდელი თანხის 0.1%-ის ოდენობით ყოველ გადაგადაცილებულ დღეზე. ორაზროვნებისა და გაუგებრობის თავიდან აცილების მიზნით მხარეები თანხმდებიან, რომ გადახდილი თანხები პირველ რიგში მოხმარდება დარიცხული პირგასამტეხლოს ოდენობის დაფარვას და მეორე რიგში - ძირითადი დავალიანების დაფარვას.

მუხლი 6. მხარეთა შორის ინფორმაციის გაცვლა

- 6.1. მხარეები თანხმდებიან, რომ გაცვლიან ინფორმაციას საკუთარი ტექნიკური საშუალებებისა და პროგრამული უზრუნველყოფის შესახებ, რომელთაც მხარეები გამოიყენებენ ინტერნეტის გლობალურ რესურსთან დაშვების მომსახურების ფარგლებში. ერთ-ერთი მხარის მიერ მეორესათვის მიწოდებული ინფორმაცია ჩაითვლება კონფიდენციალურად და წარმოადგენს მომწოდებელი მხარის საკუთრებას. ეს ინფორმაცია შეიძლება გამოყენებულ იქნას მხოლოდ იმ მიზნებისათვის, რისთვისაც ისინი იქნა მიწოდებული.
- 6.2. მხარეები არ არიან უფლებამოსილნი მეორე მხარის ნებართვის გარეშე გადასცენ მესამე პირს 6.1 მუხლში მითითებული ინფორმაცია, თუ კანონის საფუძველზე არ არსებობს ასეთი ინფორმაციის გამჟღავნების ვალდებულება.
- 6.3. ინფორმაციის მიწოდების მოთხოვნა და პერიოდულობა განისაზღვრება მხარეთა საჭიროების მიხედვით.

მუხლი 7. მოწვევის ოფერტის მოქმედების ვადა

- 7.1. წინამდებარე ინტერნეტის გლობალურ რესურსთან დაშვების შეთავაზების წინადადება (“მოწვევის ოფერტა”) ძალაში შედის 2013 წლის 1 აგვისტოდან და მოქმედებს 6 (ექვსი) თვის ვადით 2014 წლის 1 თებერვლამდე.

მუხლი 8. დასკვნითი დებულებები

- 8.1. მხარეთა შორის შეტყობინება განხორციელებულად მიიჩნევა მისი წერილობითი ფორმით შესრულებისა და უფლებამოსილი პირის დამოწმების შემთხვევაში. შეტყობინება მხარეებს უნდა მიეწოდოს კურიერის, დაზღვეული წერილის, ან ფაქსის მეშვეობით ხელშეკრულებაში მითითებულ მისამართებზე, თუ მეორე მხარე 5 (ხუთი) სამუშაო დღით ადრე არ შეატყობინებს საკუთარი მისამართის შეცვლის შესახებ.
- 8.2. ერთ-ერთი მხარის მიერ “მოწვევის ოფერტით” ან “ინტერნეტ მომსახურების ხელშეკრულებით” გათვალისწინებული რომელიმე უფლების გამოყენებლობა არ წარმოადგენს ასეთი უფლების უარყოფას ან ასეთ უფლებაზე საბოლოოდ უარის თქმას.
- 8.3. ინტერნეტის გლობალურ რესურსთან “აქცეპტანტის” დაშვების მომსახურების შესრულების ადგილად მიჩნეულია ქ. თბილისი.
- 8.4. “ონლაინსა” და “მეორე მხარეს” შორის წარმოშობილი ნებისმიერი დავა და უთანხმოება წყდება მოლაპარაკების გზით. შეთანხმების მიუღწევლობის შემთხვევაში მხარეებს შორის დავა წყდება მოქმედი კანონმდებლობის შესაბამისად.

დანართი #1

შპს “კავკასუს ონლაინის” მიერ ინტერნეტის გლობალურ რესურსთან დაშვების მომსახურების ტარიფები და ურთიერთჩართვის წერტილ(ებ)ში ტექნიკური საშუალებების გამოყენებული ინტერფეისების აღწერილობა

ინტერნეტის გლობალურ რესურსთან 1 მბ/წმ გამტარუნარიანობის სიმძლავრით დაშვების საფასური ლარში დღგ-ს ჩათვლით	ინტერნეტის გლობალურ რესურსთან დაშვებისათვის მოთხოვნილი გამტარუნარიანობის სიმძლავრის მოცულობა გამოხატული მბ/წმ ერთეულში	ინტერნეტის გლობალურ რესურსთან დაშვებისათვის ურთიერთჩართვის წერტილ(ებ)ში ტექნიკური საშუალებების გამოყენებული ინტერფეისი და ტექნოლოგია
120	1-10	100 მბ/წმ ეზერნეტ პორტი
100	11-25	100 მბ/წმ ეზერნეტ პორტი
80	26-50	100 მბ/წმ ეზერნეტ პორტი
60	51-100	100 მბ/წმ ეზერნეტ პორტი
55	101-150	1 გბ/წმ ოპტიკური პორტი
50	151-200	1 გბ/წმ ოპტიკური პორტი
45	201-500	1 გბ/წმ ოპტიკური პორტი
43	501-1000	1 გბ/წმ ოპტიკური პორტი
40	1001-5000	10 გბ/წმ ოპტიკური პორტი
35	5001-10000	10 გბ/წმ ოპტიკური პორტი

დანართი #2

შპს “კავკასუს ონლაინის” მიერ ინტერნეტის გლობალურ რესურსთან დაშვების მოწვევის ოფერტაზე აქცეპტის ფორმა

- 1. აქცეპტანტის ორგანიზაციულ სამართლებრივი ფორმა: _____
აქცეპტანტის საფირმო სახელწოდება: _____
აქცეპტანტის იურიდიული მისამართი: _____
აქცეპტანტის საიდენტიფიკაციო კოდი: _____
აქცეპტანტის წარმომადგენელი: _____
(პოზიცია, სახელი და გვარი) _____

2. ინტერნეტის გლობალურ რესურსთან დაშვებისათვის აქცეპტანტის მიერ მოთხოვნილი გამტარუნარიანობის სიმძლავრის ფარგლები გამოხატული მბ/წმ ერთეულში

3. აქცეპტანტის საკონტაქტო ინფორმაცია:

საკონტაქტო პირ(ებ)ის სახელი და გვარი	საკონტაქტო პირის პოზიცია	ელ. ფოსტის მისამართი	ტელეფონის ნომერი

4. შენიშვნა

წინამდებარე “აქცეპტის ფორმაზე” ხელმოწერით აქცეპტანტი ადასტურებს, რომ იგი სრულად გაეცნო, ეთანხმება და უპირობოდ შეასრულებს “ონლაინის” მიერ ინტერნეტის გლობალურ რესურსთან დაშვების მოწვევის ოფერტის ყველა და ნებისმიერ პირობას

_____ [ხელმოწერა]

_____ 201__ წლის _____

[აქცეპტანტის უფლებამოსილი წარმომადგენლის პოზიცია და სახელი და გვარი სრულად]